



Sisto al jere pene lâf fûr a cjoli il lat te stale e lu steve fasint boli, tal cit sul fogolâr, cuant che so pari i veve sberlât: «Sisto! Moviti a fâ di gulizion, che tu âs di lâmi dal bigatin a comprâ i ûfs dai cavalîrs».

A chês peraulis, il frut si jere visât dal disastri che al veve cumbinât l'an prime.

I cavalîrs a vevin za cjapât la fuee des cuatri, cuant che lui, sberlant, si jere inçopedât e al jere colât come un piruç su lis grisolis plenis di galete.

So pari i veve dite sù di dut e al veve tacât a scufiotâlu, fin che nol veve scugnût rivâ so nono Gjino a fermâlu.

Il cisâ dal lat su lis boris al veve fat tornâ Sisto in se e, sintint lis cjampanis bati lis siet, al jere corût vier cjase di Bepo Galete, che ai prins di Mai al vendeve i ûfs di cavalîr.

Sisto e so fradi Pieri, plui grant di un an, a vevin mangjât di corse la polente e la fertaie cul sclopit.

No viodevin la ore di lâ a cjapâ sù lis fueis di morâr par sfruçonâlis sui cavalîrs pene vignûts fûr dal ûf.

Pene lâts fûr, Sisto si jere rimpinât sul prin morâr, començant a tirâ jù fueis e ficjantlis ta lis sachetis.

«Ma tu sarâs cjastron,» al veve sberlât Pieri, «ven jù che âs sbaliât morâr!»

«Parcè varessio sbaliât?» al veve rispindût Sisto, stiçât.

«O vin di cjoli lis fueis di un cu lis moris verdis, parcé che a son plui buinis, pai cavalîrs».
Nie di fâ: ancje se Sisto si impegnave, nol rivave a cumbinâ une juste.
Al veve ancjemò di imparâ un biel pocjts di robis...

La taule de cusine e jere plene di ramascjis e Sisto e sô mari a jerin daûr a stacâ lis fueis di butâ sui pezons plens di cavalîrs. Da lis lungjis grisolis si sint il furmiâ des besteutis che a crustavin dî e gnot.

«Pene che o vin finît, vuê o podìn butalis cence taialis, parcè che cumò son avonde grancj».
A chês peraulis di sô mari, Sisto al jere saltât sù pe contentece: «Alore cumò o lavorìn di mancul!»

«Eh, Sisto, vin pene començât... tu viodarâs ce tantis fueis che o vin di cjapâ sù!»

«Ma scugnìno propit tignî dutis chistis bestiis?»

«Tâs e lavore! Che cun chei bêçs o vin di finî di paiâ il cjamp e lis samencis!»

«Sì, lu sai, ma a fasin un rumôr di no podê durmî di gnot...»

E intant che a finivin di messedâ fueis, fûr, si rivave a sintî il rumiâ des vacjis e il sfreolâ dal nono che al uçave il falçut.

Sisto, Pieri, sô mari e dute la famee a jerin daûr a netâ la galette, gjavant la bavele dal stran. Nonno Gjino al veve spiegât che bisugnave prime tirâ vie il fîl che si podeve, si lu faseve sù intune bachete e dopo si stricave par cjapâ sù dute la sede pussibile.

Sisto, intant che al meteve vie la sede, al pensave za al savôr des cjargnesis, content parcè che almancul chist an nol veve cumbinât nuie di mâl.

di 3A e 3B - Scuele Medie di Buri
(Alessandra Bardus, Marco Bertelli, Alessandro Bolzicco,
Silvia Cavan, Michele Durì, Giovanni Lerussi,
Alessia Meroi, Irene Micheletti, Claudio Bertoldi,
Alex Maestrutti, Simone Specogna,
Emma Valentinis, Rafal Wesolowski,
Matteo Buttus, Maria Schneider)

#225